



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 7 Yangia anidakangma : f Tir Yimyim

tiryimyim@aolima

tir yimyim

TAPAK 8

November 29 nü aluyimer 500
Delhi tonga aotsü: Rakesh Tikait

Sweden parliament-i PM inyaktsü
tetsür mezüngbuba shimogo



VOL. XIX NO. 448 (ADOK 448)

DIMAPUR YANGTEPNÜ (THURSDAY) YIMPOKSÜI (NOVEMBER) 25, 2021

₹ 5.00



November 24, 2021 nikonngang Dimapur nung Business Association of Nagas (BAN) ajanga ayongzüka shisalemsatepba sentong nung Ministry of MSME Govt of India nung Joint Secretary, Wt. Mercy Epao-i shilem agiba noksa nung angur. Iba sentong nung SBI, NIDC, NABARD, KVIC aser NeDFI nungi ketdangsertemi shilem agia liasü. Iba sentong ya BAN tir Wb.L. Mongkum Jamir kidang agia liasü.

Mkg nung 2x10 MVA mapatong inyaktsü imlar: AWUMT

Dimapur, November 24, 2021 (TYO): Mokokchung nung IMDH Medical Colony nung 2x5 MVA mapa joko tatemleni kati arur aser Mokokchung Powerhouse, Salangtem Ward nung 2x10 MVA yanglutsü agizük. Medical Colony nung mapa tamer saka Salangtem Ward nung ali kiburi temenok meshiba ajanga mapa meinyakteti aruogo. Ministry of Power, Government of India-i March 5, 2021 nü ita ka tsüingda ali ken o tangatetep kati marura mapatong anentsü osang sangokja liasü, ta AWUMT-i sangdong nung ashi.

Iba tensa atema Department of Power, Nagaland-i District Administration dang tiyongtsü nung mapa inyaktsü nungloktsü aser Administration-i All Ward Union Mokokchung Town (AWUMT) dang nungi teyari meshia liasü ta sangdong nungsa shia lir.

Iba sülen nungi AWUMT-i nübertem ajungtsü mechi nung akokba tashi ketdangsertem den amalitepa yaritepa arur. AWUMT-i tiyongtsü ia inyakba ajanga ali kibur den ken o angatetepogo aser October 6, 2021 nü Nagaland sorkar kübok State Land Acquisition Authority (SLAA)-ia

POWERGRID-i North Eastern Region Power System Improvement Project (NERPSIP) kübok mapatong ana inyaktsü osang angashidang Mokokchung nung alirtem kanga pelatep ta parnoki ashi.

POWERGRID-i power substation mapatong tongtipang

ana- IMDH Medical Colony nung 2x5 MVA aser Mokokchung Powerhouse, Salangtem Ward nung 2x10 MVA yanglutsü agizük.

Medical Colony nung mapa tamer saka Salangtem Ward nung ali kiburi temenok meshiba ajanga mapa meinyakteti aruogo. Ministry of Power, Government of India-i March 5, 2021 nü ita ka tsüingda ali ken o tangatetep kati marura mapatong anentsü osang sangokja liasü, ta AWUMT-i sangdong nung ashi.

Iba tensa atema Department of Power, Nagaland-i District Administration dang tiyongtsü nung mapa inyaktsü nungloktsü aser Administration-i All Ward Union Mokokchung Town (AWUMT) dang nungi teyari meshia liasü ta sangdong nungsa shia lir.

Iba sülen nungi AWUMT-i nübertem ajungtsü mechi nung akokba tashi ketdangsertem den amalitepa yaritepa arur. AWUMT-i tiyongtsü ia inyakba ajanga ali kibur den ken o angatetepogo aser October 6, 2021 nü Nagaland sorkar kübok State Land Acquisition Authority (SLAA)-ia

ibaji agizükogo.

"Ali ken o angatetepba sülen POWERGRID-i mapa inyaktsü ta imlaa liasü saka November 1, 2021 nü Ministry of Power-i Nagaland sorkar dang mapatong anena atatsü osang sangoktsüba angashia mepelar" ta AWUMT-isa metetdaksü.

October 6 bü SLAA senden amenba aser anogo 24 süir November 1 nü office memorandum agütsüba ajanga mapatong asoshi tetsükdaksü bentsür arutsü aser iba atema AWUMT mepelar. October 6 nü senden amenba sülen osang sangoktsü asübo Ministry of Power-i meyipa reprangshir lila anungji Ministry of Power-i November 1 nü sangdong agütsüba sülen ang November 3 nü office memorandum agütsüba atema sasa bilemetsür ta AWUMT-i metetdaksü.

Nagaland Chief Minister-i Ministry of Power, Government of India dang NERPSIP project maneni inyaktsü mepishiba atema pelar aser pai maneni ministry dang iba mapatong inyaka ottetsüsa jembitsü imlar, ta AWUMT-isa ashi.

CIC Nagaland inyaktsü atema I. Meyionen shim

Dimapur, November 24, 2021 (TYO): Nagaland Governor-i Chief Information Commissioner, Nagaland inyaktsü atema I. Meyionen, IGP aser Director (Rtd), Nagaland Lokayukta Police shimogo.

Nagaland state sorkari tashi agütsüba aser Right to

Information Act, 2005 kübok Governor-i I. Meyionen shimer, ta Personnel & Administrative Reforms Department (Personnel 'B' Branch) ajanga tanü sangdong ka nung metetdaksü.

I. Meyionen-i küm 3 (asem) atema mesüra pa arishi küm 65 majung tashi iba mapa inyaktsü, ta sangdong nung shia lir.

Committee on Petitions senden thinener

Dimapur, November 24, 2021 (TYO): November 24, 2021 nü Committee on Petitions, Nagaland Legislative Assembly senden amentsü aliba December, 2021-i thinenba osang metetdaksü.

Iba osang ya MLA &

Committee on Petitions, Nagaland Legislative Assembly Chairman, Toyang Chang-i ashi.

Mapang tatongtsü nung koba anogo aser mapang senden amentsü'ar osang metetdaksütsü, ta Toyang Chang-isa ashi.

Alima nung tantsütila arishi küm 124 nung asü

Manila, November 24, 2021 (Agencies): Alima nung tantsütila Francisca Susano arishi küm 124 nung süogo. La ya Philippines nungi liasü.

Susano ya putu 19 buba nung asor rongnung tatembuba ta bilemer. supercentenarian

La dang Lola ta ajar aser Hombar nikonngang 6:45 ako meta Kabankalan nung lar kidang asü. Kabankalan ya Philippines kübok Negros Occidental nung lir.

Lola ya September 11, 1897 nü aso. Iba mapang Philippines ya Spain-i yimsü süa liasü aser Great Britain nung Queen

Victoria chuba menden nung liasü.

"Onoki kanga meima aliba Lola Francisca Susano November 22 nikonngang asia osang angashidang onok kanga temolung raksa" ta Kabankalan city-i sangdong ka nung metetdaksü.

"Lola Iska ya Negros Occidental nung aser Philippines nung tantsütila ta züngshir" ta parnokisa ashi.

"La arishi küm 124 lia alima nung tantsütila ta asübaji Guinness World Records ajanga kuli agütsüogo" ta Kabankalan city-isa metetdaksü.

Land Owners' Board Ungma, Mkg & Khensa-i metetdaksür

Mokokchung, 24 NOV (TYO): Naga nübur nem India temzüng Arla 371(A) ajanga temeten agüja aliba wazüka ayutsü mechi, Nagaland Municipal Act 2001 nung ali aser ki saru (Lands and Building Tax) dak sentakba osettem nung State Assembly ajanga temelenshi magi tashi ozü Lika nung ULB election magidaksütsü ta mezüng telemtetba nung tanüa ajang-ajanga noktaka lir, ta yim asem sangeri tentetba Land Owners'

Board Ungma, Mokokchung & Khensa Chairman, Imtisüngküm aser Secretary Imlikümzüik nati yokba sangdong ka ajanga metetdaksüogo.

Land Owners' Board-i Government of Nagaland, Municipal Affairs, Department sangdong Order No. MA- 79/ 2017 anogo Kohima, 18th November, 2021 khenyongi magizüker, ta Land Owners' Board Ungma, Mokokchung & Khensa-sa metetdaksü.

Cooperative Department-i "No work - No pay" tenzüktsü

Kohima, November 24, 2021 (TYO): Nagaland Cooperation Department nung mapa shitak meinyakertem dak "No Work - No Pay" inyaktsü lemtetogo.

Iba mapa ya Head office Kohima nung teshimtet telok kati ketdangsüa inyaktsü.

Bodbarnü Registrar of Cooperative Societies (RCS) Conference Hall nung Cooperation Department indang 10 buba Review Meeting amendang iba telemtetba agi.

Sendenji Joint Secretary

Cooperation Department, Kusa Fithu menden ser agi aser district o sub-divisional officers den head office nungi tongti ketdangsertem aden.

Senden nung RCS Temjen Longkumer-i field officers dang mapa shitak inyaktsü ayongzüik aser mapa shitak meinyakertem merenshi ta ashi.

Paisa mapa shitak meinyakba cooperative societies indang license agentsü metetdaksü.

Senden nung district aser sub-divisional officers-ia audit

agiba, loan meyipa bendenba, cooperative societies license agenba aser field inspectors mapa inyakba osangtem lemsatet.

Taoba küm ka tsüingda sorkar dang nungi loan agiba Rs. 157.460 lakhs bena arutetogo ta ARCS Imsununsang-ia ashi.

Deputy RCS Imnanukshi-ia cooperative societies 693 indang audit asüba osang agütsü aser taoba küm ka tsüingda sorkar senpongi Rs. 5,64,572 aitiba metetdaksü.

Union Cabinet-i Farm laws agentsü atema bill agizükogo

New Delhi, November 24, 2021 (Agencies): Prime Minister Narendra Modi-i Farm laws asem meyipa agitsü osang metetdaksüba sülen anogo pungu lir Bodbarnü Union Cabinet-i iba indang bill agizükogo.

Cabinet-i tanü agizükba bill ji taruba hopta Parliament Winter Session nung benoktsü.

"Farmers Produce Trade and Commerce (Promotion and Facilitation) Act, 2020, Farmers (Empowerment and Protection) Agreement on Price Assurance and Farm Services Act, 2020 aser Essential Commodities (Amendment) Act, 2020 meyipa agentsü atema bill agizükogo" ta Union Minister for Information and

Broadcasting, Anurag Thakur-i ashi.

"Prime Minister Narendra Modi menden ser tanü Cabinet senden nung onoki Farm laws agentsü atema teinyaktsü ajak renemogo. Taruba Parliament session nung onoki farm laws agentsü atema inyaktsü" ta Thakur-isa ashi.

Ajüsüaka, pai Minimum Support Price atema ozüing yanglutsüba indang telangzübabo magütsü.

Cabinet-isa Bodbarnü March 2022 tashi Prime Minister Pradhan Mantri Garib Kalyan Anna Yojana (PMGKAY) scheme inyaktsü molunga agizük.

"Cabinet-i ita pezü (December 2021 nungi March 2022) atema PMGKAY maparen atsülangtsü

lemtet. Iba scheme kübok linük nung nisung crore 80 tema nem ita shia jangotsü angati agütsür" ta Thakur-isa ashi.

March 2020 nungi iba scheme tenzükba sülen nisung crore aikati tajangzüik agiogo. Taruba ita pezü nung iba scheme inyakdang Rs 53,344 crore endoktsü, ta paisa ashi.

"Alima nung nisung crore 80 nem ita aika jangotsü agütsübaungi India dang lir. Tang tashi nung jangotsü 600 lakh metric tonne lemozüktsüogo aser 541 lakh metric tonne lemogo" ta paisa shisem.

"State aser Union Territory ajak nung iba scheme inyaker. Ita pezü atsülangba densema iba scheme nung Rs 2.60 lakh crore endoktsü" ta Thakur-isa metetdaksü.

COVID-19 Nagaland: 10 dak putet & 6 anep

Kohima, November 24, 2021 (TYO): Nagaland nung Bodbarnü nisung 10 dak COVID-19 ailiba putet aser 6 taneptsü angu.

"Tanü putetertemji Dimapur nung nisung 7, Mokokchung nung 2 aser Kohima nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüingda nisung 6 taneptsü angu. Parnokji Dimapur nung 5 aser Kohima nung

1 lir" ta paisa ashi.

Nisung 32,078 rongnungi 30,192 taneptsü nguogo aser ibaji taneptsü angur 94.12% lir, ta paisa shisem.

Tang nisung 130 anepaludar saka parnok 104 dakbo shirangba yimya kecha mali, ta Dr. Kikon-isa ashi.

"Mongulbar tashi nung nisung 729,533 nem COVID-19 vaccine indang dose 12,66,688 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,976, healthcare workers 15,999, arishi küm 45 ser temapur 206,731 aser arishi küm 18 nungi 44 tsüingda alir 445,827 lir" ta paisa metetdaksü.

"Vaccine agirtem rongnungi nisung 536,688-i dose anaprong agiogo. Parnokji frontline workers 48,386, healthcare workers 13,487, arishi küm 45 ser temapur 170,341 aser arishi küm 18 nungi 44 tsüingda alir 304,474 lir" ta Dr Thurr-isa ashi.

BJP National VP aser Mokochung nung party lenirtem senden amen



BJP National Vice-President Dr M Chuba Imsong (abelen nungi pezububa) den BJP Mokochung district ketdangsürtem November 24, 2021 nü senden alidang tangokba noksa nung angur.

Dimapur, Yimpoksüi/Nov. 24 (TYO): National BJP Vice-President, Dr M Chuba Imsong-i Mokochung district nung aliba BJP karyakartas tem dang state kinük-kisang ajungalen party indang sentong inyaktetsü asoshi nungdakba mapang ajak den putepa inyaksü tanüla alitsü ajungshia liasü.

Political party kati temolung nung tokorem malitsüla aser BJP indang sentong balala ajanga nüburtem anir arua tejakleni aotsü asoshi lenmang bushitsüla, ta pai ashi.

BJP National Vice-president ya Mokochung semdanga BJP Mokochung district ketdangsürtem, mandal (assembly constituency) nung inyakertem aser morchas (frontal organisation) den senden amentsü asoshi oa liasü, kong BJP office nungi lenirtem dena liasü.

Dr. M Chuba Ao-i senden

nung jembidang akhi mapang pa Bharatiya Janata Party nung adenba aser timtemba indang lemsatet. Pa BJP nung züngokba mapang state nung BJP karyakarta kangabo meliasü, ta pai ashi.

Tesüiba anogotem bilemteta jembiba mapang, national party ka ama BJP ya künü anogo linük anitsü aser nüburtem dak rangloker sentongtem yanglua inyaksü aser northeast nung aliba nüburtem ajangzüksü bilema meliasü, ta Dr Chuba-i ashi.

Nagaland nungbo BJP ya ano junga mamendakteti lir, saka küm ishika tsüngta sorkar tentetsü atema maangka arutsü aser mangdang balala asangdang kuma inyaktetsü, ta pai ashi.

Anungji karyakartas tem tezü danga malitsü ajungshia aser parti renloksü asoshi sentongtem yanglutsü maangka bushitsü ayongzüka liasü.

Iba sentong nung BJP

Mokochung district tir Imolemba Jamir-i tarur pela agizükba o jembiba mapang Dr Chuba Ao indang takum otsü aser political wadang indang tongmelang agi rateta ashi.

Dr Chuba ya Nagaland nung BJP tenzüker rongnung ka lir ta ashi aser timtem jenti ajurua temaba jenjang tongtet, ta Jamir-i ashi.

Pa BJP national vice president shimtetba ya pai party asoshi mapa tajung inyakba kuli amai lir aser Naga nung asoshi tejak tentetba ka lir, ta ashi.

Iba sentong nung 24 Angetyongpang mandal, 28 Koridang mandal, Yuva Morcha, Minority Morcha aser Mahila morcha tirtemi o jembia liasü.

Iba sentong nung ST Morcha, BJP Mokochung tir Oyimpong Longchar menden liasü aser BJP Mokochung district vice president Lanutoshi Longkumer-i Tsüngrem temoatsü meshia sarasadem.

UGC ajanga scholarship atema application meshir

Dimapur, Yimpoksüi/Nov. 24 (TYO): University Grants Commission (UGC), Ministry of Education, Government of India ajanga scholarship atema online application meshir.

Academic Year 2021-2022 atema (1) Indira Gandhi PG Scholarship for Single Girl Child (SGC); (2) PG Scholarship for University Rank Holder candidate (URH); (3) IshanUday Special scheme for North Eastern Region (NER); (4) PG Scholarship for Professional Courses for SC/ST candidates (PGSPROF) kübok application agizüksü atema National Scholarship Portal (NSP) ya August 18, 2021 nü lapoka liasü.

Scheme shia talenba aser teinyaksütem ya 'National Scholarship Portal' nung angutsü. Kaketshir shibasa temsüa ali aser recognised süa aliba reju nung admission agia ali, parnoki National Scholarship Portal indang website- <https://scholarships.gov.in/> nungi application agütsütetsü.

Portal ya tsünglanglen agüja aliba mapang telemsa nung 'Fresh' aser 'Renewals' atema lapoka lir:

Online application ya November 30, 2021 tashinung shibangtsü. Mabensa aliba application tanaben agütsüba densema Institution temi kaketshir indang application tem December 15, 2021 tashinung

jangiashitsü.

Anungji kaketshirtemi mapang shidak nung pei indang online application agütsütsü ajungshir, anungjidang pei institution ajanga application ya shia aliba mapang telatet nung jangjatetsü.

Secretary of UGC, Prof. Rajnish Jain ajanga November 22, 2021 nü sangdong ka nung temsüa aliba Institution temi Portal nung application aruba den külemi tekeratiba nung jangjatsü totuyuba agütsüogo.

Institution ajanga December 10, 2021 tashinung kaketshir ajak indang application temjangjatetra, ibaji ajanga kaketshir ajangzüksü aser application meshidak alirtem metongshitetsü.

DC Kohima ajanga e-SHRAM registration drive atema metetdaksür

Dimapur, Yimpoksüi/Nov. 24 (TYO): Deputy Commissioner, Kohima, Gregory Thejawelie NCS ajanga sangdong ka nung, dokan kibur/business establishment/aonsotsü ayoker/taxi/bus anishirtem/artisan aser craftsman pur atema e-SHRAM registration drive ya November 27, 2021 nü tsünglanglen agüja aliba tesemtem nung agitsü, ta

metetdaksü:-

1. High School Junction.
2. Tinpati Junction (below Census Office)
3. Keziekie Junction (Near Allahabad bank)
4. Post office Junction (near KCCI Office)
5. Old NST
6. Union Baptist Church (Near KMC Office)
7. Viliethe complex (taxi

stand)

8. TCP Gate
9. Naga Hospital (taxi stand)
10. Red Cross Junction (PR.Hill)
11. PHQ area (below SBI Bazar Branch)
12. Jail Colony (taxi stand)
13. South point market (BOC)
14. Mohon Khola Junction
15. Lerie Junction (CRPF Camp)

Art & Culture Dept. ajanga Hornbill Festival 2021 nung shilem agitsü

Dimapur, Yimpoksüi/Nov. 24 (TYO): Department of Art & Culture ajanga Hornbill Festival 2021 nung item shilem agitsü renema lir:

1. Main arena nung anogoshi sobaliba dak sendakba shilem agitsü. State telungzük nung aliba kin 17 prong nungi Cultural Troupes kobi melie arutsü aser parnoki ken atemba aser tsüngsangba amala tebour tajung sobaliba sayutsü.
2. World War-II Museum Premises, Kisama nung Artists' Corner nung art work, demonstrative arts amala sayutsü aser ayoktsü.

3. Archives' Exhibition nung Public aser Private Records nungi otsü aketba kuli kaket tem bendena sayutsü aser kaketshir, scholar aser research agirtem azüngtsü atema facility agütsütsü aser World War-II Complex nung Departmental Publications tem ayoktsü.
4. Ajaki angutsü, angatetsü aser akhi otsü metettsü atema World War - II Museum, Kisama ya lir, kong relics aser artefacts tem sayutsü. Museum ya nüburtem asoshi anepdang 10:00 ako nungi nikongdang 4:00 ako tashi lapoktsü.

Kohima Police-i temesepba mozü gram 498 apu



Dimapur, Yimpoksüi/Nov. 24 (TYO): Kohima Police nungi team kati November 24, 2021 anepdang 10:30 ako meta Phesama nung akhi ama gari soita mita bushiba mapang Mahindra Scorpio (registration No. AS06F-0498) ka Senapati, Manipur nungi Dimapur leni aoba anendakja mita bushidang heroin südi ta temolung melemtetba oset gram 498 sapon case 39 nung kanga junga aleper bona aliba nguteta liasü, ta sangdong ka ajanga ashi.

Iba temesepba mozü ya gari

indang spare tyre telung aser engine alidak miima yua aliba ngutet.

Iba dak sendakba nung nisung ana, Timothy aser Matia puogo aser temesepba mozü den gari pua lir.

Bushisüngdangba mapang iba temesepba mozü ya international market nung sen crore 1.5 jenjang, ta bushiteta liasü. Iba dak sendakba ken o maneni bushisüngdangtsü atema South Police Station nung ken o ka benoka lir, ta sangdong ajanga ashi.

13th NLA mechi Kohima nung traffic atema totuyuba agütsür

Dimapur, Yimpoksüi/Nov. 24 (TYO): Kohima nung November 25 nungi 26, 2021 anogotem 13th Nagaland Legislative Assembly indang session 9 buba alitsü aliba dak sendakba nung tsünglanglen agüja aliba traffic temzüng tem amshitsü Kohima Police ajanga metetdaksü.

1. Agüja aliba car pass aliba garitem dang Assembly Secretariat telungi aittsü melatsü.

'X' (Black letter with Green background) - Legislators atema

'Y' (White letter with Blue background) - AHDs/HoDs atema

'Assembly Logo' (Red Background) - Assembly Staff atema

'LH' (Blue letter with Yellow Background) - Police Personnel aser P.S/PA atema

'O' (Black letter with White Background) - IPR/Media aser danga Department atema

'ON ASSEMBLY DUTY' (White letter with Blue background) - Staff B u s / P o o l & Dak Vehicles atema

aliba lenmang nung anepdang 6:00 ako nungi gari kata anena ayutsü memelar:

BSNL Telephone Exchange nungi Classic Island tashi.

Raj Bhavan nungi M.S Classic Island tashi.

Classic Island nungi High School ajanga Assembly Secretariat tashi.

New CM Official Residence, Phezoucha nungi Assembly Secretariat tashi.

3. Assembly Session aliba mapang gari tulutem Kohima jila nung anepdang 6:00 ako nungi tenzüka session metembang tashi jajatsü memelatsü. Assembly Session aliba mapang Kohima jila nung osettsüset agizüksü aser inoktsü maparen anepdang 6:00 ako tashinung tembanger alitsüla.

Iba totuyuba nung nüburtemi amalitep akatsü imlar aser aibelener gari police temi atsür aotsü aser atsür aoba taa gari kiburi menoktsü, ta sangdong ajanga ashi.

4. Gari tulutem 'D' Block road nung anentsü memelatsü.

Assam Cabinet-i SEBA & HS Education Council lokteptsü lemtet

Guwahati, November 24, 2021 (Agencies): Bodbarnü Bongaigaon Deputy Commissioner indang Conference Hall nung Assam Cabinet senden amendang Board of Secondary Education Assam (SEBA) aser Assam Higher Secondary Education Council (AHSEC) ka kuma lokteptsü telemetba agiogo.

Chief minister Himanta Biswa Sarma-i anir amenba Cabinet senden nung lemtetba osang ya Sarma-i osangbener dang ashi.

Tang ya Board of Secondary Education Assam (SEBA) aser Assam Higher Secondary Education Council (AHSEC) balala inyaksangshir.

National Education Policy 2020 (NEP 2020) tassenba mapa kuma inyaksü atema Assam nung education board ana ka akümtsü lemtet.

Assam Cabinet-isa state nung

5+3+3+4 system tenzüksü lemtet. Assam Secondary Education Act, 1961 (Assam Act, XXV of 1961) ya Assam nung secondary education ketdangsütsü, reprangtsü aser yanglutsü atema Board of Secondary Education ka tentetstsü lemtetba liasü.

Board of Secondary Education, Assam dang SEBA ta ajar aser iba ya March 14, 1962 nung tentet.

State education department kübok higher secondary education (classes XI and XII) ketdangsütsü, reprangtsü aser yanglutsü atema Assam Higher Secondary Education Council (AHSEC) tentet.

Pradip Hazarika nem Cabinet menden agütsür:

Tanü senden nungsa Amguri MLA Pradip Hazarika nem Cabinet menden agütsüogo.

Hazarika-i Satra balala nung ali atsünga agiba indang ludentem

len ania inyaksü. Iba luden nung züngsemtemji- MLA Mrinal Saikia aser MLA Rupak Sarma na lir.

Taruba Cabinet sendenji Dima Hasao district kübok Haflong nung January 5, 2022 nü amentsü.

Cabinet-isa state sorkar mapa inyakerkem nem January 6-7 anogotem sodi agütsütsü telemetba agi.

State sorkarsa Youth Commission ka tentetstsü aser parnoki mapa mengui aliba lanurtem aser tetsü oshi nung azüngertem yaritsü.

Assam Agitation nung taküm samaba kinungertem yaritsü atema Trust ka tentetogo ta CM Sarma-isa metetdaksü.

Iba dang Trust for Welfare for Victims of Assam Agitation and Their Family ta tenünga jaogo.

Iba mapa ya Rs 500 crore ajanga tenzüksü aser tatsüka lir ano sen teimba akümtsü.

BJP-i Tripura civic elections nung nübortem amokmerener

Agartala, November 24, 2021 (Agencies): Tripura nung civic bodies' elections nung vote meinoktsütsü atema BJP-i amokmerener ta Opposition CPI-M-i tai tongloktür.

Bodbarnü Agartala nung Tripura CPI-M tanishir Phulan Bhattacharya-i iba osang ya metetdaksü.

La toktepbpa ward nungi vote

enoktsürtem amokmerener BJP züngsemtem aser parnok pusemertemji lai meteta lir ta Bhattacharya-i ashi.

BJP züngsemtem aser parnok pusemertem polling stations nung vote enoktsürtem amokmerener ta laisa tai tongloktür.

Iba osang ya Tripura police department ketdangsür dang

shiogo, ta laisa shisem.

Külen, Trinamool Congress (TMC)-ia BJP züngsemtem aser pusemertem amokmerenaka polling stations nung nisung aika vote enoktsütsü atema adenshir ta metetdaksüogo.

Tripura nung civic bodies' elections ji November 25 nung agitsü aser November 28 nü votes azüngtsü.

President Kovind-i Pranab Jyoti Das nem Shaurya Chakra agütsü

Guwahati, November 24, 2021 (Agencies): President Ram Nath Kovind-i Rifleman Pranab Jyoti Das nem Shaurya Chakra konang agütsüogo.

Arunachal Pradesh kübok Longding nung tasü itta raraba atema iba konang agütsü.

"6 Assam Rifles nungi Rfn Pranab Jyoti Das nem November 22 nü Shaurya Chakra agütsüogo" ta Assam Rifles-i sangdong ka nung metetdaksü.

2020 kum Arunachal Pradesh nung telungpur anema inyakdang

rifleman Pranab Jyoti Das-i telungpur ana kaset aser yirur aliba sepai ka kümzüka liasü.

"President Kovind-i Rifleman Pranab Jyoti Das, 6th Battalion, Assam Rifles nem Shaurya Chakra agütsür. Pai Arunachal Pradesh nung telungpur ana kaset aser yirur aliba sepai ka kanga tasü itta kümzüka" ta President indang office-i metetdaksü.

Arunachal Pradesh nung telungpur trok aliba osang tejangja angashir mapa inyakdang Rifleman Pranab Jyoti Das-i shilem agi.

Anepdang 4:10 ako meta rifleman (General Duty) Pranab Jyoti Das-i meter 70 shi pilar telungpur angu.

Iba mapangji telungpur jagi sepaitem dak injang khaloktsü aser rifleman Pranab Jyoti Das-i iba telungpur kaset.

Iba sülen telungpurtemi injang aika khaloktsüdang sepai aika yirua liasü. Ajisüaka, rifleman Das-i pa atsüka aliba tesem nungi adok aser yirur aliba sepai ka kümzüka.

Das-i telungpurtemi anasa orr khatap aser idangji ano pai ka kaset.



Bodbarnü Assam health minister Keshab Mahanta-i Bodoland Territorial Region (BTR) kübok Kokrajhar semdangdang agiba noksa ka angur. Tanü pai Kokrajhar nung medical college yangluba repringdang aser iba mapang BTR executive member - Arup Dey, MLA Lawrence Islary aser MLA Jiron Basumatary nungeri pa meina liasü. (Kokrajhar, November 24)

GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA

NO.HED/SCHO-1/2016/Dated: Kohima, the 24th, Nov. 2021

Ref: NO. 22-1/2021-ES.4. dated 11th, Oct. 2021

(Ministry of Education)

Department of Higher Education,
External Scholarship Division, GOI.

2022 COMMONWEALTH MASTER'S SCHOLARSHIP TENABLE IN THE UNITED KINGDOM.

It is to be informed that the Government of the United Kingdom is offering scholarship to Indian Students for pursuing full time Master's Degree Courses (except MBA) in UK starting from the September/October 2022. The detail information in this regard can be viewed on the website of the Ministry of Education, GOI. i.e. <https://www.education.gov.in/en/scholarships>

Sd/-
(Dr. APENI LOTHIA)
DIRECTOR
HIGHER EDUCATION
NAGALAND: KOHIMA

Issued by DIPR

DIMAPUR WATSÜ TELONGJEM

37 Buba Lokti senden

Anogo : 27th Nov. 2021

Mapang : 10 ako nungi

Tesentepdak : Corner Stone College Duncan
(Near DABA main Church)



SENTONG 1

- Sentong anir : Mendenpurtem
- Telok Ken : Watsü Anthem
- Lai zünga sarasadem : Wt. Moalem Imchen
Asso. Pastor Women EDABA
- Oshi Oben ya Kin ka Ayak : Wt. Renemsongla Ozk
(15 mnts)
- Temeja ken : Mopungchukettsür
Telongjem Dimapur,
Tayonger Mendenpur
- Putu den Liromedema
litetba Tetsür : Wb. N. Lipok Jamir Pastor
Diphupar Ao Baptist Arogo
(25 mnts)
- Mezüng senden : Wt/ Y. Akümla, Taoba Tir DWT
tenüngsang

SENTONG 2

- Osangtem agitsü a) Tongti zülur Osang
b) Sen bentet osang
c) Nungtet Luden Osang
- Osangtem nungi O lemtet Mapang
- Menden Melentepba : Wt. Alila Wai Jami
Mapang Taoba Tir DWT
- Menden tatem O :
- Tatem sarasadem : Telok

KI SÜBU INOKTSÜR :

Chuchuyimlangtsür Telongjem Dimapur

TIMSÜR (USHERS):

Anakitsür Telongjem Dimapur

METETDAKTSÜR

- Tebilemba (Agenda) lira senden metenzükdang Mendenpur ket tongjangma.
- Sendeni arur ajak asen Aotsür sübotsü meraketa sübur arutsü mepishir.
- Senden temer telok chiyongba mapang alitsü.
- Sentong takok asoshi ajaki sarasadema atadi.



TIR YIMYIM YIMOBILEM (EDITORIAL)

DIMAPUR YANGTEPNÜ, YIMPOKSÜI (NOVEMBER) 25, 2021

Democracy Takok

- *Tangsen Lemtur*

Yaküm India nung aluyimba sector nung sorkari Parliament nung ozüng tasen asem agizükba anema state balala nungi aluyimertem Delhi arrtsülen adenshir longkak aita aruba sülen asüng (November 26) küm ka abensatsü. India nunger puti otsü nung nüborongsen jenti lalua mapang talangka longkak aitba rongnung iba ya-a ka asütsü. Tatemsabo Ato kilonser, Narendra Modi-i aniba sorkari aluyimertemi akhangba agizüka aluyimba ozüng asemprong agientsü telemtetba agiogo; iba ya democracy takok ka lir. Sorkaribo item ozüng ajanga aluyimertem kanga tajangzük angutsü ta jembia aruogo, ajisüka aluyimertemibo item ozüng ajanga aluyimertem kanga takoksa angutsü, ta melung melemi bilem. Ashiko, iba ozüng mebenokdang mezüngyongi sorkari aluyimertem nem item ozüng junga angatdaksü asübo yamai timtem majurula. Centre sorkari aluyimertem dang, aluyimba ozüngtasen asem ya ajanga aluyimertem tajangzük angutsü ta shiaka aluyimertemi sorkari ashibaji mamang aser sorkar dak melung malem, ibayongji aluyimertemi ozüng tasen asempronglaji agientsü takhangba agüja aru. Sorkari mapang talangka nungi aluyimertem sendoker ta aluyimertemi bilemer, anungji sorkari aluyimertem melung koktettsüsa meinyaktet. Ato kilonseri ashiba ama item ozüng ya aluyimertem tajangzük angutsü atema süra aluyimertem dang masü saka nüburtem-a memeteti ajangzükla, saka pai jembiba oji aluyimertemi mamang. Aluyimertemi, item ozüng ajanga MSP aser Mandi system anentsüa akok aser item ozüng ajanga parnok masü saka corporates kar dang tajangzük angutsü ta tsübu. Sorkari tanga party tem, mongintem mesüra aluyimer lenirtem den shisa melemsatepi iba ozüng benoka agizük. India nunger temzüng kübok Parliament aser State Assemblies nung opposition teinyaktsü shilem indang junga shia lir. Parliament nung sorkari benokba bill ajak nung o lemtepa mesüra o toktepba jembir sülen ang mapa kuma inyaktsü atema bill agizüker aser tongtibang onük ajak benoka o lemteptsü nungdaker, ajisüka sorkari Parliament nung iba onük nung o junga melemtep mesüra state tem dena mejembitep, anungji item ozüng asem ya democratic masüba inyakyim ajanga agizük, ta ashitsü akok. Sorkari item ozüng magientsü, ta küm ka tashi tekong kanga meranga aruba sülen tesüsabo aluyimertemi akhangba ama item ozüng agientsüsa akümbaji democracy takok lir. Ano külen sangküm küm tetenzüklen Uttar Pradesh, Punjab aser Goa state tem nung assembly elections agitsü aliba agi party jenjang meraksatsü atema sorkari item ozüng agien, ta opposition party temibo aitsür. Parliament nung oppositon-ia aluyimba ozüngtem anema nokdak saka kecha mesütet, ajisüka India linük atema 'tongtoret' ta züngshiba nütsüng shilem 58 (aluyimertem)-i sorkar anema apusoba tongbang maneni raraba sülen tatemsabo takok nguogo.

OLEMSABANG

TEINTET ROGO ASER AZÜNGMEYAK. (Ageing and Loneliness)

~ Mr. LONGPOZENBA

Meimchir ka taküm nung timtem aika agi sünga lir. Item rongnung azüngmeyak ta asüba timtem ya, tangar dang anisüngzüka rasaa meshitetba temulung animesüngzükteba, tokrong tia ka ta shiteter. Meimchir kati tia aser mapang balala nung iba azüngmeyak ya ajurushir. Arem min nung ajuruba azüngmeyak, lanurtemi kakat shisatsü tajung ngur mapa (job) mungutetba agi mepelateti azüngmeyaka bilemba, adianu tajung pei kidang mesüra bendanglima talang nung tejak mungui süadokba agi azüngmeyak tia ajuruba, ano taküm nung mapa tajung aika inyakaka menempangtetba maksü tulu ajurushiba agi aazükba azüngmeyak, matamabensartem (disable) azüngmeyakba, tashidak tulu agi meneper pei akaba rongsen ajak endokma timtemba tebilemstütem agi bener arutsüba azüngmeyak, sentsü tulu agi khuret ulura abendang menepa azüngmeyak, temenenpur kati Khrista jangja majurudang ajangshiba azüngmeyakjia aika shitettsü südi. Item dakji alaka ano tanga aika lir, naia aika shitettsü südi. Saka tanü asenoki külemi shisadangnüba azüngmeyak yabo teintet rogotemi ajurushiba azüngmeyak indang lir.

Teintet rogo taküm ya mesüi alir akümlirtem ajaki ajurutsüba tia ka lir. Kodang teintet rogotemi iba mapang ka tonga arudir, parnok taküm nung tebilemstü aika tenzüker. Pei sasa pei dak, alishi aser shisatsüdak temulung alemba tasütait nungi ajema akümer, iba jagi parnok taküm lipaliru aika nung tamang makai kümdaktsür. Parnok dak shisatsü tajung aika alibaji alimai joko menüngdaker amai bilemer. Lokti atema (decision) telemtetba agitsübaji alimai joko parnok shilem masü ta tasümeti bilemer, tasüita nokdaktsüba nung parnoki joko atsüka atar. Onok mapang süiogo ta joko nemjemseta bilemer. Alimai bushitetba shisatsü aser technological advancement kanga karaa ainba agi parnok dak aliba tashitemji joko tongtipang masü amai parnoki imdangi arur. Alimai joko parnok nungi shisatsü magitsü ta parnoki bilemer, lokti aika nung joko tashi-itba mapang ama meliteter, saka aiben kija aser kibong nung dang anogo aser mapangtemji süitemdaktsür. Item tsürapurtem taküm nung ya atangji azüngmeyak tiatemji majurulima.

Temeimtsü tsürapur teintet rogotemji tashi ajema tainba akümdang, tashidak aikati meneper aser teintet rogo tashidak nungi mejenbuteter. Tashidak tapu balala nem parnok kokdaktsüsübaji parnok asoshi tebilemstü tulutiba koba parnoki kanga maginür. Kechiaser item timtem ajakji kinunger, chirnurtem nem khuret agütsüdang parnok mulung kanga tipmatemer, parnoki iba tebilemstü kanga süoki ia bilemer. Parnoki parnok sasa nokdaktsü mekoki akümer, joko shisabulu aser tebilemstütem agi azüngmeyak tia kati bentsür arur.

Asen tsürapurtem kodang tain kümdir parnoki amtaka aliba ali wadang, government tenzüka wadang, peii jangraa aliba rongsenketzüng lemangtem nungi anentsüsa akümer. Anogotem süitema aodang, taküm nung tebilemstütem ajurudang joko parnok nungdak ajak asoshi rongsen agi meperibaji parnok asoshi tebilemstü tuluba akümer. Rongsen lemangtemji parnok sasa meperiteter asünung chirnurtem dak nendaktsüsa akümer. Item tia balala ajurudang tangar den melemsateptetba tepilemstütem agi teintet rogo takütem aika asoshi azüngmeyak tia tenzükdaktsür.

Meimchir yimya ama teintet rogo Tsüngremi agütsüba arishi anogotem kodang tongtir, ka mesüra kati tama temeibatem toktsür aodang, rishirtem taküm nung azüngmeyak tulutiba jenjang kati aitsüsa bentsür arur. Loktiliba nungi atsüngzükba mapang ka, rongsen teyari lemangtem nung meperiba mapang ka, alishi tashi meiti aoba mapang. Tangar dak dang nentaka alitsüba mapang ka nung ano temeim kinungtsü mesüra kinungpo kati kodang toktsür süadoker, iba azüngmeyakjibo kechadena medemdangtsü makokba tia kati bentsür arur.

Teintet rogo mapang nung koda masü tia aika ajurutsüsa akümer. Temang (physical sickness) anepaluaka noklang nung noklang (100%) shilem mejungteter, saka noklang shilem nung 40-50% shilem dang jungteter. Rongsen lemangtem nung ajema lir. Item tia mapang ajak jagi teintet rogotemji aiben memulungaka tangar dak nendaka alitsüsa akümer. Pei sasa nokdaktetba, litetba jenjangtemto süitema or joko meyipa marur asünung, aiben taküm nung temulung aser shisatsü yiruadoker aser shiranga alir. Item ajak jagi taküm nung libaliru mesademi akümdang taküm nung azüngmeyak tia nungi mepaitokteti alir.

Teintet rogo tetezü joko alimar yimya libaliru maparen aika nungi anisüngzük mapang kati bener arutsür ta sayur. Ano tongtipangsa temeibatemi toktsür or, külem züngartemi toktsür or kelen, loktilipa nungia atsüngzüktsüsa kümdaktsür. Mazüngi dang aliba putu (busy schedule) ka nung tanü asenok ya alir asünung, chirnurtemi, semchirsemnurtemi, kiyongertemi, arogoi, medemsortem liaka majurutepteter asünung, (media tapu aika liaka item jagipo tetibo meperiteter), ali nung kija alir ama dang aiben bilema azüngmeyaker.

Tsüngremi meimchir nem tatem makai bilemstü shisatsü agütsü nung, taküm ka nung tekolok aser shisatsü ramia maküm tashi meimchir kati teti dang bilema alir. Teintet rogotem joko koda masüba mapang agi menepatoker asünung, parnok taküm nung tebilemstü aika agi nongpanga akümdang, azüngmeyaka bilemba tia jagi yakta dang parnok lenjii aruadoker.

Meimchir ka taküm nung jangraa inyaknüba aika dang lir, saka item tejangraba ajakjibosa metongteter südi. Item tesüiba otsüren indang bilemdang azüngmeyaker asü? Na Khrista jangja makaba ajanga anisüngzük makai taküm nungji azüngmeyaker asü? Zülusema aruba tebilemstütem rongnung ano mamsemba tiatema koba agisa teintet rogotem azüngmeyaka toktsür?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Pope Francis-i India semdangtsü aliba atema renemshir



Myanmar kübok Kayah state yimtiba, Loikaw nung Arogoi lapokba Karuna clinic noksa nung angur. November 22 nü Myanmar sepaitemi iba clinic nung inyaker healthworkers 18 apu.

New Delhi, November 23 (Agencies): November 22, 2021 nü New Delhi nung yimsü balala nungi tongti lenirtem seminar ka agiba mapang tawa Pope Francis aser Ato kilonser, Narendra Modi na senden amenba pelaa agizükba den külemi yimsü balala amangertem adianu ama temeimtep nung aliba jenjang ajungkettsütsü atema bangjem. Taoba ita Rome nung G20 summit senden nung adentsü aoba mapang Modi-i Vatican nung Pope Francis ajurua liasü. Pope Francis-i India semdangtsü aliba atema renemshiba tenzüka Hombarnü Press Club of India, New Delhi nung "Encounter" omen nung ajemdaker seminar ka agiogo;

iba sentong nungji India nung tamangba yimsü balala nungi lenirtem, putirtem, nun tem aser osangbenertem aden. Iba sentong nung okila jembidang Delhi tongti putir, Anil Joseph Couto-i, "Asen Ato kilonser-i Pope Francis ajuruba atema yimsü balala nungi lenirtemi yimsü balala amanger ajak tesünep nung alitsü aser asen linük renloktsü atema bangjemer," ta metetdaksü. Paisa, India nung sobaliba, kin aser tamangba yimsü aika lir, aser asenoki maneni iba maitsü wazüka ayutsüla, ta ayongzük. All India Imam Organization nung tongti lenir, Umer Ahmed Ilyasi-i, Pope Francis-i India Ato kilonser agizükba aser India

semdangtsü melungba atema pelar; nüburtemi asen linük nung adianu ama temeimtep alitsüla, ta ashi. "Chichiba yimsüji sensakertem, amitsürtem aser lajartem yariba lir," ta paisa ashi. Indian Parliament of Religions national president, Goswami Sushil Ji Maharaj-i, Modi-i Pope India-i jaokbaji mera tuluka agiba lir, aser pai tekaraba nung India semdangtsü imlar, ta ashi. India Ato kilonseri Pope jaokba ajanga osang tajung ka sangoktsür, talisa tanga yimsü amangertem akhümtsübuttsü ayongzük, ta ashi. Hindu nung lenir, Swami Krishnanand Paramhans-i, "Asen to kilonseri Pope semdangba ajanga pai yimsü ajak akhümtsübuba kuli sayur," ta ashi. International Mahavir Jain Mission nung President, Acharya Vivek Muni-i, India nung sobaliba balala aika liaka yimsü balala amangertem ajak telongjem nung alir, ta ashi. Kasa sentong nung Gurdwara Bangla Sahib nung tongti putir, Giani Ranjit Singh aser Ramakrishna Mission, Delhi nung tongti, Swami Shantatmananda natia jembia liasü. Iba seminar tembanga yimsü balala nungi lenirtem taruba Khristmas nung Yimjung Chuba tanela ajanga asen linük kongshitsü atema sarasadema liasü.

ANO GO ABEN TSÜNGREM DEN

Maneni sarasademang

Sarasadem nung maneni akangkanga liang, aser idakji tenüngsang agütsüba den saksalema liang. Kolosi 4:2
Kolosi nung aliba khristantem ama alitsü Pauli tetuyuba agütsü. Kati ka khu bentepbang, kati ka dang tai toktepbang, meimtepang, Khrista Oji ne dak mungdakjang (Kolosi 3:13-16). Kechisa inyakdir mulungsoa aser Yisu tenüng nung inyaksüla ta Pai parnok dang ashi (t. 17, 23). Idangji pai parnok sasa sarasadem nung akangkanga alitsü ashi. Akangkanga tetezü tanen makai. Asenoki tanen makai inyakba jagi Tsüngremi asenok sarasadem langzütsü ta amangba sayur. Asenoki aji metet saka Tsüngremi asen mapang nung asen sarasadem melangzür. Saka asen tamangi asenok nem mapa pezü bilemtetdaksür. 1) Tsüngremi asenok tia metet kechiaser Pa ajak Metetsang. 2) Asen tia tiyong nung Tsüngrem asenok den dena lir, kechiaser Pai ajak metet. 3) Tsüngremi Pa mapang nung asenok sarasadem langzütsü. 4) Asen asoshi Tsüngremi tajungtiba telangzüba agütsütsü.
Nai langka asoshi mesüra kar asoshi maneni sarasademtsü aniadokra, idangji item onüktem ya bilemtetang: 1) Renema liang (temulung makai teküm), aser 2) Tenüng sangang. Tasen Lai ajunga nung Pauli asenok dang tenüngsang agütsütsü indang ashir. "Kecha nung temulung tatemala saka ajak nung sarasademba aser mepishiba aser tenüngsang agi nenoki meshiba Tsüngrem nem metetdakjang" (Fil. 4:6). "Teti pelaang, maneni sarasademang, kechisarena nung tenüngsang agüjang" (1 Tesa. 5:16-18). Asenoki maneni sarasademtsüla aser asenoki teti tenüngsang agütsütsüla. Tsüngremi tajung ajak aser tabensa sempet agütsür (Yakob 1:17), tang aser teti tatem makai. Ibaji asoshi asenoki tenüngsang agütsütsüla.
Oba, tangar asoshi aser ni asoshi bendanga agüja sarasademba taküm ka ni kümjang.

Evangelical lenir Melvin Tinker süogo



November 24, 2021: British Anglican nung sayutsüngir aser kaketzülür, Rev. Melvin Tinker alima nungi pilaogo; pa arshi küm 66 liasü. Tinker-i pa akumli mapang kaket 15 shi zülüogo. Pai zülüba kaketem rongnung That Hideous Strength: How the West densema lir. Taküm October ita nung par jabaso, Michael-i tebu dak pancreatic cancer tashidak putetba osang twitter ajanga lemsatepa liasü. Iba sülen November 19 nü Michael-i, "Kübu arrshi tatembanglen kati arudar. Taoba Hombarnü pai 'chemo' agitsü atema jembia liasü, ajisüaka CT scan ajanga pa temang nung cancer kanga prokshir aliba putet. Tangbo pai hospital toktsür kidang onok den lir," ta metetdakja liasü. Melvin Tinker November 23 anepdang züngia asü. Pa ya küm 26 tashi St John's Newland nung vicar liasü, iba sülen yaküm August ita nung pai Church of England toktsü.

Tinker-i US website Anglican Ink ajanga, "August 2020 nung St John, Newland nungi Anglican network of churches tasen tentet. Iba sangdong agütsüba sülen hopta ana tsüngda nisung 550-i Christ Church Newland, Christ Church Riverside aser Christ Church Orchard Park nung adentsü tenüng agütsü," ta metetdakja liasü. Tinker tembar aser taoba mapang Queen atema chaplain, Gavin Ashenden-i, tan putu nung evangelical lenir tajungtem rongnung Tinker densema liasü, ta ashi. "Pa ya kanga shisataka kaketzülür ka aser Laishir ka liasü," ta paisa ashi. Christian Concern chief executive, Andrea Williams-i, "Tinker-i ajak dang alia Yisu meim. Pa ya lenir tajung ka, sayutsüngir aser tesayur tajung ka liasü. Pa kanga tasütait lenir ka liasü. Pai tensa ajak junga metet aser pa tebilemba jembitsü metsübui liasü," ta metetdaksü. "Pai nisung masü saka Tsüngrem ang tsübu. Pai secular sobaliba dang masü saka Arogotem tashimait anema-a tasü itta jembia," ta paisa metetdaksü. "Iba lima ajanga pa melung yiru saka pai anogo shia Kibuba den tepela nung jaja; pa dak miim tashiji ibaji liasü. Ni na kanga menungratsü, talisa nü dak lenisüba sempet aser nü tesayubatem bilemtettsü," ta Williams-isa metetdaksü.

Cyprus nung Arogotemi Pope Francis agizüktsü renemshir

November 24, 2021: December 2-4, 2021 anogotem nung Pope Francis-i Cyprus semdangtsü lia Arogotem maziügi renemshidar. Cyprus kübok Limassol yimti nung aliba St. Charbel Arogo nung putir, Ibrahim Khita-i, "Onok kanga pelar aser pai semdangtsü atema kanga yongyar," ta metetdaksü. Iba Arogo nung kibong 1,800 shi lir aser parnok timbaka 1975-1990 civil war mapang Cyprus-i jena arurtem lir. "Pope-i semdangtsü aliba atema onok kanga maziügi renemshidar. Iba sentong atema committee aser subcommittees den volunteers 200 dak tema aonung-sangwa makai kanga maziügi inyakdar," ta paisa metetdaksü.

Cyprus nung Arogo balala nungi choir nung nisung 110-i shilem agitsü, ta Khita-i ashi. Tanela nung renemshia alitsü atema Arogotemi sentong balala ayongzüka agidar, ta metetdakja Khita-i, "Pope-i region nung yimjung osang proktsü ta onoki amanger. Lanurtemi, talisa Lebanon nung lanurtemi teimla osang nüngdaker," ta ashi. Cyprus nung Maronite tongti putir, Selim Sfeir-i sarasadem onüktem lemsatepogo aser Latin Catholic Khristantemia kasaji inyakdar, ta pai metetdaksü. Cyprus, Catholic aser Orthodox Khristantemi Pope-i semdangtsü aliba atema kanga pelar aser yongyar, iba denji külemi Arogo ana tesendaktep junga lir, ta pai metetdaksü. Maronite Eparchy of

Cyprus-i Caritas Lebanon nungia nisung 18 jaokogo aser parnok rongnung organization Tir, Michel Abboud aser Caritas Youth züngsem 13 densema lir. Osangbener den jembidang Caritas Youth nung tongti lenir, Peter Mahfouz-i, nüburtem kanga pelateper aser Pope Francis tejak chitepa ajurutsü imlar, ta ashi. Mahfous-isa, "Pope-i region nung yimjung osang proktsü onoki imlar. Lanurtemi, talisa Lebanon lanurtemi teimla osang nüngdaker," ta ashi. "Pope Francis-i tekaraba nung Lebanon semdangtsü imlar," ta paisa ashi. Pope Francis-i rara agi kongshia aliba linük ya semdangnüba aiben lemsatepa aruogo.



Nov. 24, 2021 anogo nung Crossroads Ministry kübok Christ redemmed ministry-i achaayanga Church Planting Movement Training sentong ka Dimapur nung agutsüogo. Non believers den inyaker Sanüker aser Missionarytem 36 tashi sentong nung tena liasü. Iba sentong nung shisa len sayur Director Olem Jamir liasü. (Dimapur, Nov. 24, 2021).

OLONG PAITEP # 6007

1			2			3		4	
				5					
	6								
						7			
		8							
9									10
			11		12				
13									
14						15			

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 6006 TELANGZÜBA

TIPILEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong, 6. Lungkak,	
10. Tsünpang, 11. Tesangwa, 13. Aoksa,		7. Milak, 9. Zünga, 10. Temopu,	
15. Putir, 16. Yipru.		12. Walu, 14. Ali.	

Künü anogo asangur ka, tola ajak nungji lipstick sünga nüshir, yi agi jemkanger, yi pongdang ka longpant pocket nungi juteta adoka semer bus ka nung mener newspaper ka züngyaa alidang tambur ka atua amen. Tena sensaksemer.

Yijemsang : Uncle, ni langka asüngdangdini?
Tambur : Asüngdangma.
Yijemsang : Ya Arthritis ta asüba ya komala tashidak ka ar na?
Tambur : Iba tashidak ya tenüktelen, teloktep ya waka kangshir ati, nenok amala yi jema, tetsür den mashii seplepsepar dak bulua atongerako.Na iba jagi kangshirana?
Yijemsang : Masüako, masüako. Asenok Pastorba iba tashidak yagi atonga ta osang kaküt nungya lirja!

Lilir : WhatsApp

TANÜBO NAI LANGZÜANG

Q. 'World Television Day' koba anogo nung amunger ?
 [A] November 18 [B] November 21
 [C] November 23 [D] November 25

(Taruba adok nung onoki langzütü)

YASHI ADOK TELANGZÜBA: 2025

AO OSHI ANGAZÜKDAK:
TANÜ ANGAZÜKTSÜBA OJANG

Lepshi
 (v) kasa o tanaben ashi (repeat the same words)
 *Yimteni Covid wara nungi kümzüka alitsüsa inyaktsü **lephsia** metetdaksü.
Lepshi
 (v) nok agi ajak lepa aoba (cut down all by dao)
 * Nokinketeri tsükchirtem ajak **lephsia** ao.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.


Tepela Tasoba Anogo

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :



NAI-A YA METETTER MA

November 25, 1837 nü William Crompton ajanga "silk power loom" yanglutet.



SUDOKU # 6048 TELANGZÜBA # 6047

5	3				7	9	2	7	1	6	4	5	9	3	8	
9			3	4		1	6	8	3	9	7	2	1	6	5	4
2		1	9	6			8	4	5	6	9	8	3	2	7	1
7	9	4	2		5		3	3	2	4	5	7	8	1	6	9
			6				4	1	9	5	3	6	4	7	8	2
1	6			7	3	9	2	7	6	8	1	9	2	3	4	5
8		2	1	4			7	9	4	3	8	1	7	5	2	6
6		3	5	2		4	1	6	8	7	2	5	9	4	1	3
						5		5	1	2	4	3	6	8	9	7

OJANG LUTEP # 5604

KOJO : [][][][]
 UDAIT : [][][][][]
 PANMAG : [][][][][][]
 NGERATOJI : [][][][][][][][]
 NGNISU : [][][][][]
 AAIK : [][][][]
 SABUHLISLU : [][][][][][][][]
 REKHUT : [][][][][]
 NTJEI : [][][][][]
 ITSALÜ : [][][][][]

OJANG LUTEP TELANGZÜBA # 5593

KHEN ATEMA TIMTEM AREMA MEINYAKNER ASÜDANG
 TETI ATEMA LENMANG SHIBANGER

TAN HOPTA ATEMA - KOMA SÜLA ?

Q. Asen lima nung 'Clean Election' indang ya kenyongi mejembi aser meinyak nunga koma süla ?



November 24, 2021 nü Bhopal nung Congress lenir aser Rajya Sabha MP, Digvijay Singh leniba nung party züngsemtemi BJP MLA, Rameshwar Sharma indang office kima longkak aitba noksa nung angur. Sharma-i, Congress Party lenirtem temekok sükdangtsütsü' ta jembiba anema Congress-i longkak ait.

Union Cabinet-i aluyimba ozüng tasen asem agientsü lemtet

New Delhi, Yimpoksüi/ November 24 (Agencies): Bodhbarnü Union Cabinet-i aluyimba dak sendakba ozüng tasen asemprong agientsü lemtetogo, ta Union Cabinet senden amenba sülen Union minister, Anurag Thakur-i metetdaksü.

Osangbenertem den jembidang Thakur-isa, taruba Parliament nung aluyimba ozüng asem agientsüji sorkar atema tongtibangba onük asütsü, ta metetdaksü.

Union Cabinet senden ya Ato kilonser, Narendra Modi leniba nung amen.

November 29 nungi tenzükba

asükwa mongpu Parliament senden tenzükba sülen senden nung sorkari 'The Farm Laws Repeal Bill, 2021' benoktsü.

Ano külen Union Minister Prahlad Joshi-ia, taruba Parliament nung aluyimba ozüngtem nung o lemteptsü atema agriculture ministry-i jembidar, ta metetdaksü.

Farm Laws Repeal Bill, 2021 ji ajanga Farmers' Produce Trade and Commerce (Promotion and Facilitation) Act, 2020, Farmers (Empowerment and Protection) Agreement of Price Assurance, Farm Services Act, 2020 aser Essential Commodities

(Amendment) Act, 2020 agientsü.

Taoba hopta Ato kilonser, Narendra Modi-i, sorkari aluyimba ozüng tasen asemprong agientsü atema telemtetba agiogo, ta metetdakja liasü.

Ato kilonserisa, Minimum Support Price (MSP) inyakyim atema sorkari committee ka tentetsü, ta metetdaksüogo.

Sorkari ozüng asem agientsü aser aluyimertem nem MSP agütsütsü, ta nangzükaka aluyimertem unions-i tanga takhangba onük balala ajak mataloktsü tashi longkak aittsü telemtetba agiogo.

March ita tashi PM Garib Kalyan Ann Yojana scheme atsülanger

New Delhi, November 24 (Agencies): Bodhbarnü Union cabinet-i sangküm March ita tashi PM Garib Kalyan Anna Yojana scheme atsülangtsü telemtetba agiogo.

Yaküm coronavirus wara prokba mapang sensakertem khuret pungbatsütsü atema yaküm April ita nung Centre sorkari iba scheme sangdonga liasü.

National Food Security Act (NFSA) kübok linük nung nisung crore 81 jungnüa nem ita shia jang seret pongungu (5) angati agütsür. Iba scheme sangdongba sülen iba scheme ya shilem pongububa asütsü.

PMGKAY scheme atsülangba ajanga chiyungtsü subsidy nung ano sen crore 53,344.5 indoktsü. PMGKAY shilem 5buba nung jang touzük 163 lakh ton shi agütsütsü.

Iba scheme mezüngbuba shilem April-June 2020 nung agütsü, tanabuba shilem July-November nung agütsü, shilem tasembuba taküm May-June nung agütsü aser shilem pezübuba July-November, 2021 nung agütsüdar.

PMGKAY kübok tang tashi nung Centre sorkari states aser UTs nem jang 600 lakh ton agütsüogo aser iba nungji sen 2.07 lakh crore shi indokogo.

Tan ita tetenzüklen Delhi Chief Minister, Arvind Kejriwal-i aniba AAP sorkari angati ration agütsüba scheme ano ita trok atsülang aser Centre sorkar danga sensakertem nem jang angati agütsüba scheme ya ano ita trok danga atsülangang, ta mepishia liasü.

Tamalen Food Secretary, Sudhanshu Pandey-i, Centre sorkari November 30 sülen nungibo PMGKAY scheme agütsütsü tebilemba mali, ta metetdakja liasü saka tanü cabinet senden nung iba scheme sangküm March ita tashi atsülangtsü lemteter.



November 24, 2021 nü New Delhi nung BJP Mahila Morcha züngsemtemi tantsürtem nem old-age pension agüjang, ta takhangba agüja longkak aitba noksa nung angur.

November 29 nü aluyimer 500 Delhi tonga aotsü: Rakesh Tikait

New Delhi, November 24 (Agencies): Bodhbarnü Bharatiya Kisan Union (BKU) lenir, Rakesh Tikait-i, November 29, 2021 nü aluyimer 500 tractor nung Delhi tonga aotsü, ta metetdaksü.

Paisa, November 26 nü aluyimertem senden ka amenba mapang nung telemtetba kar agiba sülen ang osang tejangja sangdongtsü, ta metetdaksü.

Yaküm November 26 nü aluyimertem Delhi arrtsülen adenshia longkak aitba tenzükba sülen Brihostibarnü küm ka ajungba anogo nung parnok senden amentsü.

Osangbener den jembidang Tikait-i, "November 29 nü aluyimer 500 tractor 30 nung Delhi tonga aotsü. Onoki longkak aitba tenzükba sülen küm ka ajungba anogo-November 26 nü senden amenba sülen ang osang tejangja sangdongtsü," ta metetdaksü.

Paisa, "Onoki sorkar dang Minimum Support Price (MSP) atema ozüng ka yangluang ta akhanger; sorkari ibaji agizükba sülenbo onoki longkak aitba anentsü aser senshitsu. January 26 (Republic Day) tashi onok Delhi arrtsülen amongtsü

tebilemba mali. Onoki MSP akhanger aser longkak aitba mapang nung asür aluyimer 750 kibongtem nem senotsü teyari agüjang ta sorkar dang akhanger; sorkari ibaji agizükra onok kidangi meyipa aotsü," ta metetdaksü.

Aluyimertem MSP dak alia 'Commission for Air Quality Management in the National Capital Region and Adjoining Areas Act, 2021 kübok aluyimertem anema benokba ozüngtem agientsü, Lakhimpur Kheri ken o nung tai tonglokja alisang, Ashish Mishra tebu, Ajay Mishra Union Minister of State for Home menden nungi jendoktsü, longkak aitba mapang aluyimertem anema benokba ken o ajak agientsü aser longkak aitba mapang asür aluyimer kibongtem nem senotsü teyari agüjang, ta akhanger.

Aluyimertem BJP anema election campaign agitsü aliba dak sendakba nung tasüngdangba ka langzüdang Tikait-i, "Model Code of Conduct (MCC) benokba sülen ang onoki BJP anema nüboyimtsü atema telemtetba agitsü. Tangbo sorkari mapa inyakdar, anungji parnok nem teinyaktsü inyakdakjang," ta ashi.



November 25 nü Ato kilonser, Narendra Modi-i Uttar Pradesh kübok Jewar nung International Airport ka yanglutsü atema lung azüngtsütsü lia Bodhbarnü iba sentong atema renemshiba noksa nung angur.

Sorkari tekara nung international flights tenokdangba agientsü

New Delhi, Yimpoksüi/ November 24 (Agencies): Ministry of Civil Aviation nung Secretary, Rajiv Bansal-i, kobi melii Centre sorkari international flights tenokdangbatem agientsü aser service tenzüktsü, ta metetdaksü.

Coronavirus wara prokba aziüktsü aser nokdangtsü atema yaküm March 31 nü Centre sorkari international flights nokdanga liasü. Ajisüaka tatsüka dang lirbo tayimtsü senzütsü atema linük kar denbo bangjema liasü. Tang India-i linük 28 den 'air bubble' tezüngzüktep agia item linüktem tsüngdabo tayimtsü senzür.

Civil aviation regulator-i November 30 tashi international commercial tayimtsü senzüba nokdangogo. Ajisüaka Directorate General of Central

Aviation (DGCA)-i, "Iba tenokdangba kübok DGCA-i temelaba agütsüba international all-cargo operations aser tayimtsütem madener," ta metetdaksü.

Coronaviurs wara mapang linük balalai oa alir India nunger anir arutsü atema India-i 'Vande Bharat' kübok tayimtsütem senzüa bendang linük balala nungi sensotem anir arua liasü.

Ano külen documents shidak lia ainlen senzütsü atema India-i linük kar den 'air bubble' tezüngzüktep agi.

Tang linük balalai aotsü atema India nunger covid vaccine agiba certificate agizüker aser tanga linüktemi India nunger agizüktsü atema RT-PCR test dang nungdaker. Ano külen linük telung nung dang senzüba tayimtsütembo ajak senzütsü melar.

Sweden parliament-i PM inyaktsü tetsür mezüngbuba shimogo



Stockholm, Yimpoksüi/Nov. 24 (Agencies): Social Democrat lenir Magdalena Andersson ya linük nung ato kilonser inyaktsü tetsür mezüngbuba asütsü, ta Sweden indang parliament ajanga jangjatsüogo.

Arishi küm 54 tain Andersson ya tang yimsü tesüdak Social Democrat party nung lenir ka ama ita tetenzüklen akum, aser Bodhbarnü parliament nung confirmation vote agitepba mapang ato kilonser menden azüngtettsür Stefan Lofven melentsü shimtet.

Züngsem 349 aliba Riksdag nung nisung 174-i la anema vote agütsü. Saka parliament züngsem 117-i la bukuma vote agütsüba den ano züngsem 57-i iba vote agütsüba nung shilem magi.

Sweden yimtenren kübok ato kilonser ka akumtsü atema parliament nung nübu timba

menüngdaker, saka ato kilonser anemer timba masütsüla.

Andersson ya tang Sweden indang finance minister ama teinyakdak lir, aser Hokulbarnü King Carl XVI Gustaf ajuruba sülen ato kilonser akumtsü.

Libaliru aser inyaksangshi balala nung tetsür tebur kasa amshiba linük ka süaka Sweden nung tetsür katia ato kilonser inyakdanga mali.

Danga Nordic linüktem - Norway, Denmark, Finland aser Iceland - nungbo tetsüri sorkar aniogo.

Mapangtong nung Andersson-i Mongulbarnü Left Party den tezüngzüktep ka yanglua pension timba kumdaktsütsü nangzükba sülen la ya shimteter alitsü.

"Sensaktiba pensioner tem indang senotsü tashi itshitsü tezüngzüktep ka yanglu," ta Andersson-i iba tezüngzüktep yangluba sülen public

broadcaster SVT dang ashi.

Left Party lenir Nooshi Dadgostar-ia iba tezüngzüktep agiba indang jangjatsü. "Onoki Andersson menokdangtsü," ta lai Swedish Radio dang ashi.

Sorkar nung Social Democrats indang coalition partner ka ama Greens ajanga Andersson yarir.

Ita tetenzüklen Lofven-i menden nungi alur right-wing sorkar ka nem melendaktsütsü asoshi telemtetba agiba sülen Centre Party-ia la menokdangtsü shia liasü.

Ajisüaka Centre Party lenir Annie Loof-i, Bodhbarnü parliament nung sorkari benokba budget atema vote agütsüba nung "hai" ta vote magütsütsü, ta ashi, anungji opposition finance bill ka agizütsü akok.

Tang yimsü tesüdak coalition aser Left Party tsüngta tezüngzüktep yangluba ajanga sorkar ya maneni left tsütsü aor, ta lai ashi.

Opposition party aseme common budget ka benoka lir, koba parliament nung takok angutsü mesük, anungji Andersson kanga kera timtemi aitsü.

Iba tetetzü Andersson yagi mapang tatsüka 'right-of-centre budget policies' nung yimsü asütsü teimla sayur.

Ato kilonser menden nungi yutsütsü alisang Lofven-ia iba ama tensa ya 2014 küm ajurua lir saka pa menden nungi alutsü mesangdong dang yamaji meinyaktet. Iba yongji pa melener nem September 2022 general election asoshi renemshitsü mapang agütsür.

US-i Taliban den Qatar nung jembishinü tenzükshitsü

Washington, Yimpoksüi/Nov. 24 (Agencies): United States-i Qatar nung taruba hopta nungi Taliban den Afghanistan nung nüburtemi timtem balala ajuruba aser linük ya kiralongra tenzükba tesem ka mesüdaktsütsü indang jembishinü tenzükshitsü renema lir, ta US State Department odongtar Ned Price-i ashi.

Hopta ana jembishinütsü sentong aliba nungya US delegation ya US special representative for Afghanistan, Tom West-i anitsü, ta Price-i Mongulbarnü ashi.

"Parnoki Afghanistan nung asen linük tejangraba indang jembitsü. Yangji counterterrorism, asenoki balaka züngzüktepa aliba Afghan nung aser US senso timtem majurui Afghanistan nungi ainshitsü, teyari balala aser linük rongsenketzüng dena lir," ta Price-i osangbener dang ashi.

West yagi October ita Zalmay Khalilzad melen aser November ita tetenzüklen Pakistan nung Taliban nungi teshimtet nübu tem ajurua liasü.

Iba mapa ya magizükdang pai US delegation nung shilem ka ama Qatar nung Taliban ketdangsurtem ajurua lir. Iba senden ya Qatar yimtiba, Doha nung October 9 nungi 10 tashi agia liasü, kong US diplomat temi Taliban sorkar tasenba den tesendaktep ka yanglutsü meranga liasü.

Taoba mapanga US ketdangsurtemi Qatar nung Taliban lenirtem den ita aika jembishinüa aruogo aser 2020 kü February ita tezüngzüktep ka yanglua Afghanistan nungi US ainshi aser Taliban-i amokbanga

liasü.

2001 küm September 11 nü US nung lendong tulu agütsüba mechi mitkartemi Taliban yimli laokdaktsür küm 20 sülen Afghanistan nungi US aser linük balala sepaitem ainshitsü anogo ishika lia August ita tom nung Taliban-i linük amokbanga liasü.

US-i tang tashi Taliban sorkar ya yimjak nung agizüka mali saka Qatar ya Washington indang diplomatic representative ka ama asütsü, ta November tetenzüklen sangdonga liasü.

Washington nungi senotsü aser diplomatic teyari angutsü atema US-i mapang shia Taliban nem par teinyaktsü agütsür, kiralongrar den raratsü, ajak aliba sorkar ka amenoktsü, kin tilatem aser tetsür temeden akumtsübuttsü aser shisaliok aser employment nung kasa maongka agütsütsü ashir.

US-i maneni Taliban den jembishinütsü sentong lir saka tang atemabo teyari dang agütsütsü, ta Tom West-i taoba hopta shia liasü.

Kasa mapang Taliban-i US dang rongsen billion \$9.5 soita aliba chioktsü ajungshir.

Teyari nung metaloka aliba Afghanistan rongsenketzüng laogo, kong sorkar tenzükter nung ita aika sen magütsüteter aser bendanglen nungi osettsüset bener arutsü atema treasury ajanga sen magütsüteter.

Taoba hopta US Congress dangi shidi ka züluba nung, linük nung senotsü peria maliba ajanga timtem tali adoktsü aser nüburtem linük balalai jenshia aotsü, ta Taliban Foreign Minister Amir Khan Muttaqi-i shia liasü.

Ethiopia indang ato kilonser Abiy Ahmed tongpangi ogo

Addis Ababa, Yimpoksüi/Nov. 24 (Agencies): Ethiopia Ato Kilonser Abiy Ahmed rara ketdangtsütsü atema tongpangi ogo, ta sorkar den sendaka aliba media ajanga ashi.

Abiy maliba mapang pa indang maparen Deputy Prime Minister Demeke Mekonnen Hassen-i inyaka atatsü, ta Fana news outlet ajanga Bodhbarnü ashi.

Abiy-i Hombarnü menur sangdong ka nung, Tigrayan sepai den raratsü asoshi tsüngtong aotsü sentong lir, ta ashi.

"Rara nung ajurutepti. Bendanga agütsür linük anitsü mapang tongogo," ta pai ashi.

Taoba ita Tigrayan sepai aser par den sendaktepa alirtemi linük yimtiba, Addis Ababa bushia arutsü amokmeren, aser parnok yagi region nung rongnendak tesem tongtiba, Djibouti den Ethiopia sendaktepa aliba nokdangtsü atema kanga sashia rarar.

Tigrayan-i iba lenmang nokdangtsü merangba Ethiopia mitkar aser region nung aliba sepaitemi nokdangtet, ta US

Special Envoy Jeffrey Feltman-i Mongulbarnü ashi saka Tigrayan sepaitem Addis south tsütsü otet.

Taoba küm November ita ato kilonseri Tigray People's Liberation Front (TPLF) anema raratsü totuyuba agütsüba sülen nisung meyerijang aika tepsetogo aser ano meyerijang aika ayawara jenjangi yokogo, ta asadangteta lir. 2018 küm Abiy ato kilonser makumdang TPLF temi central sorkar amokbanga liasü.

Tigrayan sepaitemi maneni Addis Ababa leni arutsü meranger aser linük yimtiba nungi kilometre 220 pilar aliba Shewa Robit jila agiogo, ta ashir.

Northern Ethiopia timba nung communication mali aser osangbener nokdang, anungji tongpang nung atalokba osang magitepteter.

Abiy-i tongpangi aotsü jembuba ajanga tashi meiti aliba sepaitem shimba nung tashi itshir.

Abiy sülen anidaktsü atema Ethiopia nung meyerijang aika adokogo aser yangji nübu tejangja aser marathon asemere

Olympic nung silver medallist Feyisa Lelisa dena lir.

Iba mepetmesü atema linük balalai ola adoker aser sorkar anemertemi linük yimtiba, Addis Ababa tsütsü arur ta sangdongba ajanga bendanger sorkartemi pei nüburtem dang Ethiopia yutsür aotsü ashir.

Addis Ababa kübok Kolfe district nung Bodhbarnü sentong ka nung army tasen noklang aika shima liasü.

Tongpang nung sepaitem den nokdaktsü ta Abiy-i sangdongba angashia aoksa, ta arishi küm 42 tain driver Tesfaye Sherefa-i ashi.

"Linük kumzüktsü mechi lenir kati pa menden yutsüdang pa nukjidongji takum alitsü masü saka iba linük kumzüktsü atema lir aser pai 'kü sülen anidakang' ta shir tongpangleni aodang ni nüktzü alu."

Yakpang nung sepaitem anitsü sentong ya Abiy-i Hombar aonung sangdonga liasü, saka iba sülen pa senzüsempangba atema ketdangsur aser state media ajanga osang magütsü.

Kolfe nung shimertemi



Abiy Ahmed

temolung taroktiba nungi agizüka Abiy noksa aliba tula semer liasü, kong "Ethiopia kumzüktsü asoshi akhi mapang nungi asenok khuret lir," ta zülua liasü.

"Ni nüma atanger aser pa den lir," ta arishi küm 25 tain Esubalew Wale-i osangbener dang ashi.

Sorkar anemertemi linük yimtiba leni aruba ajanga linük kumzükba ayutsü atema maongka tajung agütsür, ta Feyisa-i osangbener dang ashi.

TPLF-i küm 30 jungnüa yimsü asüba mapang longkak aiter külem ethnic Oromos tepsetba asoshi Rio de Janeiro

nung 2016 Olympics marathon asemzükba sülen teka mükanga sayuba sülen Feyisa ya nüburtemi tali tejangjaba meteta akum.

Feyisa-i TPLF den raratsü maongka magi malitsü, ta state media den sensaksemba Bodhbarnü sangdonga liasü.

"Linük nung aibelenba mapang ni ajem ajema nokdaker repranga melitetsü," ta pai ashi.

Ethiopia nung meta talang nung asemere aser nungtugu Haile Gebreselassie-ia rara nung yakpang nung nokdaktsü, ta sangdonga liasü.

Ajisüaka iba sensaksem yabo nüburtem dang mesayur.

Vogue-i Hornbill International Pageant ayonger



November 24 nü Hotel Crescent Kohima nung osangbenertem den sensaksemba mapang Team VEN tangokba noksa nung angur.

Kohima, Yimpoksüi/ November 24 (TYO): Vogue Entertainment Nagaland (VEN)-i ayonga Hornbill benjung mapang mezüngbuba mega international event; Miss Hornbill International agitsü.

Iba osang ya VEN director Dode Noakro-i, Bodhbarnü Hotel Crescent nung osangbenertem den sensaksemba mapang Assistant Managing Director aser official Designer, VEN Vilhousa Movi, Team leader Ravolu Chuzho, Program coordinator Zhozoto Nakro aser tanga lenirtema dena liasü.

VEN ya Nagaland nung

amenoker inyaksü atema Event Management Organization ka ama 2017 kum tentet. Fashion aser Beauty Pageant Industry nung lanurtem ajungketa model, fashion enthusiast tem nem tangazükba balala agütsütsü aser Naga nung designer tem ajungkettsü asoshi sabang lapoktsütsü nükjidong iba telok tentet.

Taoba mapang sentong balala takok ngua ayongzüka agiba sülen sentong ayongertemi jenjang ajungketshia onok sentongtem nung Miss Hornbill International bendenloka nukla ulushitsü nüngdaker ta amanger, ta paisa ashi.

Iba sentong ya Naga nung aser atema dang masü saka alima ajunga atema lir aser iba ajanga tesem balala aser linüktem tsüngda tesendaktep tajungba yanglushitsü, anungji iba ya international sentong ka akümer aser Nagaland aser Northeast adena orr tanga tesem nung alirtemia shilem agitetsü, ta Director Noakro-i ashi.

Arishi kum 18 nungi 26 tsüngda alir tejangrartemi tetoktepa nung shilem agitsü atema online ajanga apply sütetsü, aser iba atema sentong ayongertemi website ka lapoktsü, koba Instagram aser YouTube channel ajanga lemsateptsü, ta paisa metetdaksü.

Electoral Roll Observer-i Noklak nung senden ayonga agi



Dimapur, Yimpoksüi/ November 24 (TYO): Electoral Roll Observer aser Commissioner & Secretary, Land Resources Department, Vikeyie Kenya, IAS-i ayongzüka November 24 nü DC conference hall, Noklak nung political party aser Booth Level Officer tem den senden ka menogo.

Senden nung Vikeyie Kenya-i, 56th AC Noklak aser 57th AC Thonoknyu nung electoral inyakyim dak sendakba nung tebilemstü aser tetsükdaksü alibattem jangjatsü atema pai district semdang ta ashi. Paisa, electoral guidelines dak ajemdaker pei tata mapa benoka inyakba mapang takok tashi bendanga agüja tajungtiba inyaksü merangtsü ajungshia liasü.

Kenya-i, BLO tem dang electoral process nung nisung ka tenüng talila benoka aliba aser taila tenüngtem züngoksema aliba kanga junga asadangtsü metetdaksü. Paisa, BLO tem dang parnok mapa

kanga nendaka inyaksü mepeshi, kechiyong electoral inyakyim ya mapang atakzüka yur inyaker, ta ashi. Maneni pai, district nung electoral roll enter asüba mapang aibelen kecha masütsü imlaba lemsatop. Electoral inyakyim nung political party temi tongtibang shilem agitsü lir, ta shia pai political party tem dang district nung electoral inyakyim shidak aser ochi mashi inyakyim kecha melel takok ngua benoktettsü atema District Administration aser Election Office den teka amteper inyaksü ayongzüka.

Senden nungsa Deputy Commissioner & District Election Officer Noklak, HiazuMeru-i, electoral inyakyim ya linük nung kanga tongtibang inyakyim ka ta shia, Noklak District nung inyakyim nung teyari agütsütsü atema aruba atema observer dang kanga pelaba lemsatop.

Iba senden ya EAC & AERO Noklak, Kathyinla lenisüba nung agi aser SDO

(Civil) & ERO Noklak, C.Phuniang-i tepela o jembia liasü.

Sensaksem mapang BLO aser Political Party temi parnok tebilemstütem lemsatop aser Electoral Roll Observer dang ken o mejangjai alibattem asüngdanga liasü.

Kasa mapang nung online Inter School Slogan tetoktepa takoker nem Observer-i tetushi agüja liasü. St. Paul's School, Noklak nungi Class 10 kaketshir Honglin K-i iba tetoktepa akok aser tanabuba jenjang nung GHSS nungi Leing L (Class 12) aser tasembuba jenjang nung Holy Angels School, Noklak nung azünger Tsujang P (class 10) liasü.

SÜR KÜM KAAJUNGBAMENUNGRAA BILEMTETER

ASÜR MAPUTOLA
ASÜ : 25.11.2020

"Pai kü nüla süngzükdaksü,
Pai ni temeshi lelang nung pa
nüng atema anir"
- Tenungsang Ken 23:3

Kanga dang sangwa-a
prangshia aliba petinu kati
tesangwa tsüng dang toktsür
onok toktsürogo.
Nai onok toktsür kum ka
ajunger
Saka na menungra
bilemtetsüsa nai aika inyakteta
toktsürogo.

ONOKINAANOGOSHIA
MENUNGRAR

**Jala, Jabasotem aser
kinungertemi nü den temeim
salem lemsateper.**



OSTD KÜM TENEM BENJONGMUNG RANGLOK SHISATOKDEN SENTONG Tesem: IMC HALL

Mapang : 9 Ako nungi

Anogo: 27th Nov. 2021

- Sentongsür : Kr. Jemenchila Imchen
Wb. Joseph Longkumer
- Sarasademtsü : Wb. Lipok Pastor, Diphupar
- Pela agizükba : Wb. Dr. Temsuwati, Convenor
Golden Jubilee Planning & Fund Raising
Committee

Mezüng Shisatokden

- Pei sasa züsenteta takum litetba :
Wb. L. Mongkum Jamir (30 mints.)
Director, Symbios Creations Pvt. Ltd.
- Sobaliba ken : Ongpangkong Watsü Telungjem
Dimapur

Tanabuba Shisatokden

- Kin ka yanglushiba nung tetsürka shilem:
Wt. Dr. P. Kilemsungla (30 mints.)
Former Member NPSC & UPSC
- Temeja ken : Hon Jubilee Ken Luden

Tasembuba Shisatokde

- Sobaliba aser yimtenren nung tamanger ka shilem:
Wb. Akok Walling, Former Principal,
Dimapur Govt. College
- Melepszüng O : Wb. Temsupok Jamir, Tir OSTD
- Tatem sarasadem : Sentongsür

TEMETETSÜ

- OSTD shisatokden anogo nung Timsür: **Mangmetong Kaketshir
Telungjem, Dimapur.**
- Kum 18-40 tashi yim shia nungi nübu ajak arutsü mepishir.
- OSTD yimsüng shia ketdangpuri anir Sanen Luden aser Tetsür
Telungjem ketdangpur asaer Sanen Luden ajak arua iba sentong
nung adentsü mepishir.
- Iba sentong takok asoshi ajaki sarasadema atadi.

IN THE COURT OF
PRINCIPAL DISTRICT & SESSIONS JUDGE
MOKOKCHUNG : NAGALAND
S/C NO. 223/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925.

Whereas application under Succession Act 1925 for grand of Succession Certificate for the estate/pension benefit of Late Temjenzungba has been applied by Shri/Smti S.Amenla w/o Lt. Temjenzungba R/O H.No. 67 Tzumokong Ward, Changtongya Town, Mokokchung, Nagaland for possession of: 1. Closing of A/C

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 20.12.2021.

Given under the hand and seal of the court on this the 20.11.2021.

**Principal District & Session Judge
Mokokchung : Nagaland**

Assam Rifles-i tanurtem atema teyari agütsü

Kohima, Yimpoksüi/ November 24, 2021 (TYO): HQ IGAR (North) kübok Assam Rifles indang Kohima Battalion-i Honibarnü (20.11.2021) 'Kohima Orphanage and Destitute Home' nung alir tanurtem nem

teyari agütsü, ta sangdong agütsü. ajanga metetdaksü.

Assam Rifles indang moto "Friends of the Hill People" nung anidaka, Assam Rifles-i tanurtem den sensaksema liasü aser parnok nem nüngdakba osettsüset tem

Iba Children Home indang kibur Neibanuo Angami-i KODH nung alir tanurtem atema bilemja parnok nem mapang shia teyari agütsüba asoshi Assam Rifles dang pelaba metetdaksü.

NSFA-i Strongman & CrossFit tetoktepba ayonger

4th Hornbill International Strongman & CrossFit Competition
6th DECEMBER
 9:00 AM - 4:00 PM
 OLD NST, KOHIMA

Total Cash Prize Rs 1,50,000

Prizes Sponsored by **K.C. ANGAMI**
 Powered by

For Registration Email us at strongmannagaland@gmail.com
 Forms also available at Fear Fitness Gym Dimapur, Sports World Kohima, Ciekhan Fitness Gym

Kohima, Yimpoksüi/ November 24 (TYO): Nagaland Strongman & Fitness Association (NSFA) tawabangba kübok 4buba Hornbill International Strongman and CrossFit Competition, December 6 nü Old NST, Kohima nung agitsü. Iba asaya ta tetsür aser tebur naprongla atema asütsü aser anepdang 9:00 ako nungi nikongtsütsü 4:00 ako tashi

tokteptsü. NSFA tir Keduovilie Zumu-i sangdong ka ajanga ashiba agi, iba tetoktepba nung ajak senteper senpet sen 1,50,000 agütsütsü. Iba senpet ya K.C Angami-i sponsore asütsü. Iba tetoktepba atema Govt. of Nagaland, Directorate of Tourism, Directorate of Economics & Statistics, IDBI Kohima aser Kohima Smart City-ia teyari agütsütsü.

Iba tetoktepba nung shilem agitsü atema Registration form Fear Fitness Gym Dimapur, Sports World Kohima aser Ciekhan Fitness Gym Kohima nung angutsü. Iba den form strongmannagaland@gmail.com ajanga email sütettsü mesera item Mobile number; 7085962930, 7005297662, 8119888249, 9089959844 tem nung tongteprateptettsü, ta kasa sangdong ajanga metetdaksü.

'FIFA's Best Men's Player Award' atema Messi o CR7 na nominate süogo

New Delhi, Yimpoksüi/ November 24 (Agencies): Taküm, 'Best FIFA Men's Player award' atema nominee 11 rongnung Paris St Germain forward Lionel Messi, Manchester United nungi Cristiano Ronaldo, Liverpool nungi Mohamed Salah aser Bayern Munich nungi Robert Lewandowski nunger dena lir, ta Hombarnü FIFA sangdong ajanga metetdaksü. Parnok den iba award atema Neymar, Erling Haaland, N'Golo Kante, Kevin De Bruyne aser Kylian Mbappe nungeri tokteptsü. Ano, women's best player atema Barcelona nungi - Alexia Putellas, Jennifer Hermoso, Aitana Bonmati aser Caroline Graham Hansen nunger dena lir. Chelsea, shirnok taoba season - Women's Champions League final nung Barcelona-i tsükdaksü, iba club nungi Sam Kerr, Ji So-yun, Magdalena Eriksson aser Pernille Harder nunger women's best player atema nominate süa lir.

Taoba küm Lucy Bronze-i 'women's best player' award angu aser iba award atema külem England tsür Ellen White den la nominate süa liasü.

Chelsea-i Champions League title takok anguba sülen, 'best men's coach' atema Thomas Tuchel nominate süogo. Iba title atema pai Roberto Mancini den tokteptsü. Roberto Mancini akhüm nung Italy-i Euro 2020 takok angu.

'Best Men's Coach' award nominee rongnung Hansi Flick, Pep Guardiola, Antonio Conte, Diego Simeone aser Argentina coach Lionel Scaloni nunger dena lir.

Best men's & women's player, coach aser goalkeeper atema National team indang captain aser coach temi vote agütsütsü. Iba den külemi fans aser teshimtet journalist temi online ajanga vote agütsür. Hombarnü (22.11.2021) nungi voting tenzikogogo aser December

10, 2021 tashi voting atema mapang lapoktsütsü. Takok angur tenüngtem sangküm January 17, 2021 nü Zurich nung sangdongtsü.

* Best FIFA Awards 2021 atema Nominee-tem:

Best FIFA Women's Player:
 Stina Blackstenius (Sweden / BK Häcken)
 Aitana Bonmati (Spain / FC Barcelona)
 Lucy Bronze (England / Manchester City WFC)
 Magdalena Eriksson (Sweden / Chelsea FC Women)
 Caroline Graham Hansen (Norway / FC Barcelona)
 Pernille Harder (Denmark / Chelsea FC Women)
 Jennifer Hermoso (Spain / FC Barcelona)
 Ji Soyun (Korea Republic / Chelsea FC Women)
 Sam Kerr (Australia / Chelsea FC Women)
 Vivianne Miedema (Netherlands / Arsenal WFC)
 Alexia Putellas (Spain / FC Barcelona)
 Christine Sinclair (Canada / Portland Thorns FC)
 Ellen White (England / Manchester City WFC)

Best FIFA Men's Player:
 Karim Benzema (France / Real Madrid CF)
 Kevin De Bruyne (Belgium / Manchester City FC)
 Cristiano Ronaldo (Portugal / Juventus FC / Manchester United FC)
 Erling Haaland (Norway / Borussia Dortmund)
 Jorginho (Italy / Chelsea FC)
 N'Golo Kanté (France / Chelsea FC)
 Robert Lewandowski (Poland / FC Bayern München)
 Kylian Mbappé (France / Paris Saint-Germain)
 Lionel Messi (Argentina / FC Barcelona / Paris Saint-Germain)
 Neymar (Brazil / Paris Saint-Germain)
 Mohamed Salah (Egypt /

Liverpool FC)
Best FIFA Women's Coach:
 Lluís Cortés (Spain / FC Barcelona)
 Peter Gerhardsson (Sweden / Swedish national team)
 Emma Hayes (England / Chelsea FC Women)
 Beverly Priestman (England / Canadian national team)
 Sarina Wiegman (Netherlands / Dutch national team / English national team)
 The Best FIFA Men's Coach:
 Antonio Conte (Italy / FC Internazionale Milano / Tottenham Hotspur FC)
 Hansi Flick (Germany / FC Bayern München / German national team)
 Pep Guardiola (Spain / Manchester City FC)
 Roberto Mancini (Italy / Italian national team)
 Lionel Sebastián Scaloni (Argentina / Argentinian national team)
 Diego Simeone (Argentina / Atlético de Madrid)
 Thomas Tuchel (Germany / Chelsea FC)
Best FIFA Women's Goalkeeper
 Ann-Katrin Berger (Germany / Chelsea FC Women)
 Christiane Endler (Chile / Paris Saint-Germain / Olympique Lyonnais)
 Stephanie Lynn Marie Labbé (Canada / FC Rosengård / Paris Saint-Germain)
 Hedvig Lindahl (Sweden / Atlético de Madrid Femenino)
 Alyssa Naeher (USA / Chicago Red Stars)
Best FIFA Men's Goalkeeper:
 Alisson Becker (Brazil / Liverpool FC)
 Gianluigi Donnarumma (Italy / AC Milan / Paris Saint-Germain)
 Édouard Mendy (Senegal / Chelsea FC)
 Manuel Neuer (Germany / FC Bayern München)
 Kasper Schmeichel (Denmark / Leicester City FC).

Iba tetoktepba nung shilem agitsü atema Registration form Fear Fitness Gym Dimapur, Sports World Kohima aser Ciekhan Fitness Gym Kohima nung angutsü. Iba den form strongmannagaland@gmail.com ajanga email sütettsü mesera item Mobile number; 7085962930, 7005297662, 8119888249, 9089959844 tem nung tongteprateptettsü, ta kasa sangdong ajanga metetdaksü.

Indonesia Open: PV Sindhu tanabuba round-i iogo

Yimpoksüi/November 24, 2021 (Agencies): Bodhbarnü Indonesia Open Super 1000 asayamung mezüngbuba rounung nung Olympic nung medal ana tashi ngur alila PV Sindhu-i Aya Ohori koka pre-quarterfinals tongtetogo. Iba asayamung ya Bali nung tang tasayadak lir. Asaya meylongi tenzikogoba sülen Sindhu-i asendenshir kanga junga asayateta Japan tsür Ohori madak 17-21 21-17 21-17 agi takok ngua liasü. Tena tsüingda ghonda ka ser minute 10 asaya.

Iba asaya akokba sülen Sindhu-i tang tashi nung tena tsüingda 11 ben asayaba ajunga kokogo.

World number seven asayar Sindhu, shiba taoba hopta Japan tsür Akane Yamaguchi-i semifinal nung straight game nung koka liasü, la tanabuba round nung arishi küm 23 tain German tsür Yvonne Li den asayatsü.

Iba asaya ya third seed India tsür la aser world number 26 Li na tsüingda mezüngbuba asaya asütsü.

Kasa asayamung tarep temeyoktep asaya nung N Sikki Redd aser Dhruv Kapila na mezüngbuba round nung tsükogogo. Tena Japan nunger tarep Kyohei Yamashita aser Naru Shinoya nati 7-21 12-21 agi koka liasü.

Karim Benzema nem küm ka atema tenokdangba agütsü

Yimpoksüi/November 24, 2021 (Agencies): France aser Real Madrid forward Karim Benzema nem Bodhbarnü küm ka suspended jail sentence agütsüba den senchi euro 75,000 chiogo. French soccer anokshitsüba sex-tape ken o nung pa aija liasü.

2015 küm France nunger asayar Mathieu Valbuena blackmail asütsü merangba nung Benzema densema aliba nguteta liasü.

Versailles court obendang ajanga Benzema indang career nung tangsa tangbo mekongshitsü akok. Madrid nungi season tepeyong kanga junga asayaba sülen pa taküm Ballon d'Or award agizüktsü imlartem rongnung ka lir. French federation tir Noel Le Great-i, Benzema aibelena aliba ngutetyonga France team nung maneni asayatsü melatsü, ta shiogo.

Benzema okatsüri pai iba ken o maneni benoktsü ta shiogo. Benzema shibai, pa iba ken

o nung aibelena mali ta shia arudar, pa taoba ita Versailles nung ken o angdangba mapang aser Bodhbarnü obendanga agütsüba mapanga maden. Iba ken o nung ano nisung pezü tashi aitsüogo.

Prosecutors-i, aibelena aliba ngutetra Benzema dang senchi euro 75,000 achitsü aser ita 10 tepuokdak ayutsü khanga liasü.

Valbuena indang mobile phone nungia auya asütsü ta temulung melemi bilemba sex tape ka amshia pa blackmail asütsü merangba dak sendakba nung Benzema aitsü.

2015 küm November ita ken o angadangba sülen coach Didier Deschamps-i Benzema France team nungi agin. Iba ajanga Benzema 2016 European Championship aser 2018 World Cup nung shilem magitetsüsa aküm.

Iba sülen Deschamps-i Euro 2020 asayamung atema Benzema shim aser tang tashi pa team nung teti asayaa arudar.

Netherlands den ODI nung Lungi Ngidi masayatettsü

Yimpoksüi/November 24, 2021 (Agencies): Cricket South Africa-i Bodhbarnü sangdong ka ajanga, fast bowler Lungi Ngidi dak COVID-19 tashidak potetba ajanga pa Netherlands den One Day International asem asayatsü aliba nung shilem magitetsü, ta metetdaksüogo.

Kasa mapang nung bowler Lizaad Williams-a tesaret yiruba ajanga masayatetsüsa kümogogo aser pa melena Junior Dala team nung Netherlands den züngoksemogogo, ta kasa sandong ajanga metetdaksü. South Africa team nung captain Temba Bavuma nung aser tasembuba ODI asayatsü.

BILEM DANGANG

"Meranga inyaker mekokra kecha tesasa mali."